

## A pedi scazi

Cu li pedi scazi lordi di fangu  
si chidiva un pezzu di pani.  
Ora ca caminamu cu li scarpi,  
chidemu ancora un pezzu di pani.

Cu 'stu passu,  
'un sacciu comu nni finisci  
sacciu sulu  
ca 'stamu jennu 'narrè-'narrè.

Cc'è cu si linghi li panzi  
e cc'è cu mori di pitittu.  
Cc'è cu lu travagliu lu schifia  
e cc'è cu pi lu travagliu s'ammazza.

Facitinni campari comu voli Ddiu!

Senza pinsera, senza scantu di unn'aviri  
tecchia di manciari pi li nostri figli,  
di nun falli caminari arrè  
a pedi scazi nni lu fangu.

Semu divintati schiavi di 'sti quattru òmini,  
senza chi ni nn'addunamu  
nni tennu e ni fannu soccu dicinu iddi.  
Lu populu è poviru e mortu di fami.

D' iddi un poviru e un mortu di fami nun c'è,  
cu acchiana-acchiana pensa sulu pi iddu  
e a natri nni tennu cu catini a guinzagliu  
comu li cani.

Putemu abbaiari quantu vulemu,  
ansi, cchiù abbaiamu e cchiù vastunati  
ricivemu. E' ura di rùmpiri 'sti catini

e pigliari a muzzicuna 'sti patruna.

Signuri, dùnacci forza pi campari.

Facci capiri ca l'omu è uguali  
a latru omu,  
di spartiri un pezzu di pani  
'mparti uguali.

Di amàrinni l'unu cu latru  
di dividiri li peni e li gioi.  
Aiùtanni a pigliàrinni pi manu  
e furmari un cerchiu.

Unni dintra 'stu cerchiu  
ci fussi fratillanza, rispettu,  
uguaglianza tra tutti natri  
e tantu amuri pi TIA.

Chistu sulu natri vulemu!

2015 Giuseppe Cardella